

Untervazer Burgenverein Untervaz

Texte zur Dorfgeschichte von Untervaz



2024

Fasnacht in Untervaz

Email: dorfgeschichte@burgenverein-untervaz.ch. Weitere Texte zur Dorfgeschichte sind im Internet unter <http://www.burgenverein-untervaz.ch/dorfgeschichte> erhältlich. Beilagen der Jahresberichte „Anno Domini“ unter <http://www.burgenverein-untervaz.ch/annodomini>.

VAZER HÄXA SCHNITZELBÄNK 2024



Dortmund Fussballmeister?

Nu no 1 Matsch ir dütscha Bundesliga und d'Saison 2023 isch verbii
Endlich könnti statt da Bayern wiedermol Borussia Meischer si.
Das Event lönd sich au dr Elia Maffiew, Nando Thöny und Fründä nid entgoh,
Ds Geld sitzt locker und d'Vorfreud isch gross, das kömmer jo wirklich verstoh.
Drum machen sich dia 4 wackera Vazerjungs uf da Wäg Richtig Dortmund
Bim Hotel mit Ussicht uf da Borsigplatz sparens nid, das kostet denn a paar Pfund.
Unter üs gseit gseit isch dr Hotelpries so dermassa überrissa,
dass sogar z'Dütscha Fernseh ima Interview meh über ihres Budget wetti wüssa.
Drfür sparens denn bi da lkäuf vom Biar im Kiosk, isch doch klar
so holemer dr Ziis wieder ussa und kömmer billiger als in jedera Bar!
Alles wäri somit grüschtet für a gwaltigi Meischerparty in gelb und schwarz,
1 Punkt fählt no, nu leider treffen dia Dortmunder usgrächnet hüt kei grada Sparz.
Dr Punkt und dr Meischertitel sind somit verlora und d'Stimmig isch total im Keller,
aber vilicht erholt ma sich vum Schock ima bsunders komfortabla Hotelzimmer jo a biz
schneller?

Ernst Berger - Mühlalichef

Grünenabfuahr isch doch in allna Gemeinda sit eh und je as Thema,
Regla, Tafla, Wegwieser und Aleitiga, drhinter steckt sicher a ganz bestimmts Schema
Unter anderem au dia strikta Öffnizsita vu 9-11 vu üsam Mühlali in Vaz.
Wecker stella, schnida, recha und ussi fräsa, sus schotsch nämli vor gschlossnam Tor und
alles isch für d Chatz
So au dr Rudi und dr Edi wo d Gartabeiz vur Mama tüend hega und pflega,
d Moni vur Halla seit immer, «Mini Söhn, dia sind für mi an riesa Säga».
Dia Zwei chömmand zitlich zimli knapp und hend a riesa Fuar im Ahänger
«Lohn nur Ernscht, miar machen vorwärts, sus muasch du schaffa no vil länger!»
Dr Ernscht fahrt fangs füri und rüschtat sich zum gschlüssa
Bald isch jo öfli und er chan dr Samstig au no gnüssa
Vorna am Tor trifft er dr Andy Fischer...und sie verzellen sich dia neuschta Mühleli-News
S Narraschloss schlot i, Klick klack – so DO kunnt keina meh i und us!
Z mol rüeft dr Rudi vu hina füri, «hesch üs ernschthaft jetz vergessa!»
«Joo, tatsächli, vor luter schwätza und müessa umastressa»...
Lacha tüan dia vier und unterhalten sich dur s Gitter sehr patschifig
Doch plötzlich wird dr Ernscht ganz still und sini Hend zuckan uf und ab zimli iferig
«Jessas au das törf it wohr sie i muas eu öppis säga, s isch mar ger nit recht,
i glauba, mina Schlüssel hangat dahei am Schlüsselbrett, ganz schlecht»!
Zum Glück sind Weg in Vaz so nöch und ma isch schnell dahei
und kurzi Zit spöter het dr Ernscht denn au befreit dia zwei
Dr weisi Rot vu üs Hexa isch
Chömmand eifach zwüscha nüni und halbelf
ODER nehmans Zelt und d Schlofsäck mit, and just do it all yourself

VAZER HÄXA SCHNITZELBÄNK 2024



Ojeminee – wo isch mis Portmonnaie?

Dass ma im Winter us da Frontschieba tuat gseh,
muss ma am Auto achli Schiebawüschwasser geh.
Patricia Bandli-Kehl leit ihres Portmonnee aswo in Motorruum,
füllt das Wasser uf und knallt dia Huuba wieder zua mit Kawuum
Spöter am Tag stellt sie denn z'ganza Huus uf da Kopf,
nu findet sie niana ihra Geldseckel, dä arm Tropf
Sie goht fescht drvo us, sie isch iiskalt worda bestohla.
Drum muass sie sofort neus Geld und neu Uswies go hola.
A Usflug in Europapark, Feria und au sus fahrt z'Auto einigi Runda
Es isch eifach schön a bizzli dia Welt erkunda.
A paar Mönät spöter denn tuat Patricia z'Auto in d'Garage zum revidiara.
Z'eint oder andera muass ma sicher amol repariara.
Und siehe da, was holt dr Servicema unter dr Motorhuuba füra?
Z'lang vermissta Portmonnee mit allna Uswies dena tüüra.

Strom oder äba keina

Miar sind üs nūma gwöhnt, Vaz ligt total im Tunkla
Kei Sunna z Vaz, das tuat ma schu lang munkla
Obwohl das jo ger nit stimmt und dia lüt kei Ahnig hend
Isch jetzt tatsächli dr Strom usganga, und dia Tünkli het kei End
Nach abiz warta und tenka - das chunnt schu widar
Macht sich Unsicherheit breit und isch eim abzili z widar
Dia erschta Telifon uns SMS halten s gsamta Team vu üsra Gmeind voll uf Trab
Aber au dia sind rotlos und sägan - das isch s EWZ wo muas luaga, dia hend drfür an Notfall-
Stab
D Fraua dahei zünden amol alli Kerza ah und nehman glassa
D Männer hingega trieban sich bereits mir Pfunzla umma uf da Gassa
Miar müend das Problem jetz lösa, hemmar denn an Notfall-Plan?
Drzua chunnt, Zizers lüchtet hell, das sich schu fascht a Scham
Doch bald isch s Rätsel glöst und jetz weiss ma meh
Dia überam Rieh bezüchan dr Strom vumana **andara** EW
An Marder het in dr Region Chur a grossi Leitig dura bissa
D Ufregig z Vaz isch nach 2 Stund verbie, und alli Sorga sind vergessa.

REFRAIN

Vazer Häxa SCHNITZELBÄNK 2024



DomRep

Klar, es isch schu huara schüü do z'Vaz
Nu leider gits im Dorf no kei Golfplatz
Zum am Schwiezer Winter entflücha
Tuats drum mänga Vazer in Süda zücha
Dr Urs und dr Lolo flügen kurzentschlossa in d'DomRep
Mit drbi d'Golfusrüschting und au sus no viel Gepäck
Öppis wüssen's gnau dia alta Knaba,
Dia Dominikaner, dia tüand stähla wia d'Raba
Dr Urs isch übervorsichtig und hät a speziells Antidiabstahltäschli drbi,
dr Lolo - miar kennen ihn jo alli - ihm isch das doch glich
Nur a klises Stöppli mit em Auto in Santo Domingo,
kurz nid ufpasst und schwupp sind ihna d'Rückspiegel weg cho
Jonu, in ihrem Hüsli zrugg gits drfür reichlich Rum und Biar,
Do schlofens wia Herrgöttli iii in ihrem Luxusquartier.
Am nöchschta Morga kriagt dr Urs Michel a Riesaschreck,
Laptop, Geld, Handy und sogar sini Golfschuah sind wäg!
A Brüll dur d'Hütta und am Lolo verschlohts fascht dr Schnuf,
und au er nimmt denn z'erscht mol dr Zimmerbestand uf.
Hey Michali, das glaubsch nid, au mi händs brutal bestohla.
Was sölls, meint dr Lolo, denn gohni miar halt neu Flipflop go hola.
D'Moral vur Gschicht: Dr Lolo wird sinem Ruaf als Glückskind eimol meh als gerecht,
und dr Urs hät achli liechters Gepäck uf em Rückflug, das isch doch au nid schlecht!
Übringens hämmer ghört sie finden Michelis Bünta und Lolo nüm so orginell,
drum heissens ab sofort Leon und Miguel

Priscas Wiahnachts(baum)spaziergang

Ach isch das schön dia Wianacht biz Galliards dahei
«Aber jetz isch guat» meint Prisca, «dä Baum muas mar us da Bei»!
Gemäss Amtsblättli seg d Entsorgig zwor ersch am 8. Januar.
Aber dr René het gmeint as stächani schu anderi Bäum doba, das gängi sicher klar.
Ihar wüssan, nit nu dr Hund vu z. Galliarda isch gross und vermuatli zimli schwer
Au dr Baum isch richtig voluminös und in Gallia total legendär
Trotzdem schnappt sich denn Prisca mit grosser Müeh das Riesateil
Schleppt na d Stross duruf, isch im Fall choga steil
Bim Molok ako kei einzigs Bäumlü döt und sie isch au fascht alei
Was söll i jetz, na herastella und denn schnell widar hei?
Do spaziert dr Leo vur Gmeind verbi und meint, he, he - das isch vil z früeh!
Ersch am 8. Januar törfsch cho, hetsch dr chönna spara dia Müeh!
Jo guat denn halt, miar isch au nit wohl drbi
Denn spazier i mit dem grossa Teil liabar widar hei duri.

VAZER HÄXA SCHNITZELBÄNK 2024



Gnuag alt fürs Solarium?

D'Sandy vum Volg tuat z'Dubai in d'Feria goh,
schu no blöd, loht dia schön Brüni zrugg ir Schwiez so schnell no.
Aber kei Problem meint sie, i bin doch nid dumm.
Denn gohni halt uf Landquart ins Solarium!
Döt ako merkt sie: ohni Altersprüafig mit Uswies tuat dia Maschina kei Wank,
Nu leider isch ihri eige ID no dahei im Schrank.
So wiess wiana Käs und blass wieder goh isch kei Option für sie,
drum macht sie sich uf d'Suachi noch ma bekannta Gsicht zum irgendei ID z'nie.
Finda tuat sie denn ir Metzgerei Mark dr Roger Good,
mit sinem Uswies hilft er denn dr Sandy heldahaft us dr Not.
Dr Roger kann denn hei sis Fleischli go grilliara
Und d'Sandy kann endlich ihri Brüüni konserviara.
Zum Glück hät ds Solarium aschienend no kei «KI»,
will weder dr Bart, no z'Gschlecht uf dr ID stimmt mit dem vur Sandy überii.

Andy Cahenzlis Biketüürli

Au z Chur neigt sich s Schualjohr am Endi zua
Dr Andy Cahenzli und all sini Kollega sind froh, hends für as Wili iri Ruah
Zum Abschluss gönds über Stross in Frohsinn denn go essa
As wird richtig gmeütlich und Zit isch schu bald vergessa
Plötzlich ischas Zwölfi und dr Andy isch immerno am Jassa
S letschta Blatt isch gspilt und sie züchan wieter dur d Churer Gassa
Er tenkt: «Zum Glück tuan i zum schaffa wia immer mis schnella E-Bike benutza
Denn muas i au kei Taxi neh und chan hüt obig grad dia 40 Stutz au no verputza»
Sie machand d Altstadt unsicher wia in junga Johra
Am morga am vieri seit er «jetz muas i glaub hei, sus macht sich mini Frau vilicht Sorga?».
Dr Pölli frei und mit wehanda Hoor dr Heiweg am erkunda
D Sicherheitslinia sind alli komischerwies au verschwunda
«Do schwätzt doch öpper mit miar, ou d Polizei!»
«Bitte rechts herafahra, Herr Lehrer, do wär grad no frei!»
«Ah guata Morga jo iar sinds, sind ar au im Usgang gsi?»
«Nai nai Andy, aber du hesch kei Helm ah und farsch au nūma wüerkli grad duriii!»
Er muas sogar sis E-Bike vor Ort lo stoh höchi Untertor
Sini Polizei-Kollega fahren denn wenigstens uf Vaz bis vor Gaidla vor
Füf Mönat spöter, d Gschicht schu fasch vergessa und usam Sinn
kriagt ar Potscht und muas atraba voram Richter, jessas tenkt er, i glaub, i spinn
Traktor, Ahänger und E-Bike fahra sind für volli 4 Mönat gstricha usam Kalender
Zahla muass er au no a grossi Stanga Geld, und das alles bis nögscht September
Auto fahra darf er aber witerhin, do söll no eina verstoh üsars Schwitzer Rechtssystem
Hend miar do a lugga oder eifach generell a neurotischs Kontroll-Problem?
Dr weisi Rot vu üs Hexa isch:
«Am nögschta Schluasschluss nimm doch dr Nachtbus oder s Taxi
Oder no gönschtiger chämts, lütisch eifach ah dim liaba Schatzi».

vazer Häxa SCHNITZELBÄNK 2024



REFRAIN

Theater Salaz

Au letscht Jahr isch z'Theater Salaz wieder famos,
Lüt kömme in Schaara, dr Ufmarsch dä isch gross.
Z'Thema isch d'Eröffnig vuma Plüttler Purahof,
klar isch bi so nackiga Tatsacha d'Ablenkig vilicht a biz gross.
Denn während dia Schauspieler tüand über da FKK Purahof lamentiara,
kunnt dr Leo Philipp im Publikum gad a biz z'studiara.
Jetzt hani doch gmeint mini Schwiegertochter spieli do mit,
hai isch daaas komisch, aber i gsiahn sie eifach nit.
Vilicht isch dia gar nid an die viela Proba ganga,
hoffentlich plogt d'Stephanie nid a anders Verlanga?
Hät ächt dia es amouröses Verhältnis usserhalb vur Familia
Oder goht dia heimlich aswo ina Wellnesscenter go chilla?
Drbi spielt d'Stephanie insbrünschtig schu dia ganz Zyt vor Leo's Nasa ihri Rolla als prüdi
Magd,
Gell, es isch unglaublich was so a biz Füddlakratza und Spachtelmasa im Gsicht d'Lüt
verändera mag.

Bim Lolo raucht's

S letscht Jahr am Schmudo het umas Hoor d Füührwehr müessa cho
vilicht hend iar das damals vor luter Fanacht fierä ger i verno?
Uf all Fäll isch dr Lollo schu a ganzas Wieli gsi im Dorf am umastüra
Do seit er plötzlich, «liabi Kollega, i muas nu schnell hei go ifüüra»
«Denn hani nämli nit chalt wenn i heichum zu spoter Stund
Und chan direkt ins warme Bett wenn I denn bin total ufam Hund»
Gnuag Holz in Ofa und widar ab die Poscht
«Chönnt jo no awas verpassa, zaggramoscht»!
S fescht im Gerbi Zelt got witar ohni Sorga
As wenn TENKT er «liabi Fründä, Adieu Tschüss bis mora Morga».
Er freut sich unheimli uf sis warme Hexahüsli
Zweimlo heitrola und schu bald gits as wunderbars Pfüsi
Aber oha! As qualmt und stinkt vu wietam ganz furchtbar
Schnell alli Fentschter öffna, Durchzug macha und nomol ab an d Bar!
Döt wird er freudig und mit Spott begrüesst
«Hesch üs tatsächli schu sooo fescht vermisst??»
Ho - ho, chön gera mol zu miar heicho
MI wür bi dem Gstank a JEDI sofort verloh
«I han vor luuter Rauch mini eignig Hand nüma gseh
Mini Auga bissan und d Lunga macht mar weh»!
Lollo, S nögscht mol wenn vergessa tuasch dr Schiabar öffna
Henk wenigstens a paar rohi Würscht uf zum räuchara und tröchna!

Vazer Häxa SCHNITZELBÄNK 2024



Papiersammlig in extremis

Öppa fluachen jo dia alta Lüüt,
dia hütig Jugend - dia kann nüt
Aber öppis muass ma da Vazer Schüaler loh
4x jöhrlich tüands im ganza Dorf go Papier und Karton sammla goh.
A paar vo dena Junga sind sogar dermassa engagiert,
dass alles mitnehmen was nu anöchernd noch Entsorgig usgiaht.
Sie nämnen sogar dia Päckli in d'Sammlig mit,
wo dr Pöschtlter erscht gad frisch vor Türa gstellt hät.
Am Lehrer Luzi Wolf kömnen denn dia schwära Paket a biz suspekt vor,
und noch kurzer Überprüafig kunnt denn au a nigelnagelneui Kaffimaschina hervor.
Frühner vor langer Zyt händ d'Lehrer eher wäg dr Fuulheit vo da Junga gwätteret,
oder will d'Buaba ewigs im Container ghockt sind und händ im Playboy blätteret!

Edi's Kofferverwächslig

Mitam Zug uf Frankrich an d Rugby WM sind dia beida gfahra
Dr Simon Eckert und dr Edi Philipp sin amol an neua Sport go glaara
Bonjour, ou revoir, et comment allez vous ?
So sind d Vazer im TGV-Tempo acho in Paris Bordeaux zum Rendezvous.
Völlig flasht vu dera belle voyage im na neua Land
Sinds au no bim usstiege total usam Hüslü und völlig duranand
So vil Koffara in derea Gepäckablag und a paar gsend au no prezis glich us
Dia eignig Bagaschi vori aschriba, sicher nit, miar chömmand denn schu no drus.
An promoviarta Lehrer und an Spitzasportler, dena muas ma nüt erklära
Und an Vazer muas ma generell sowieso sicher nicht belehra
«Ohni ZwüsCHFäll und super ganga isch dia Reis, gell Simon,
No schnell ab ins Hotel und denn direkt ins Rugby-Station»!
Zimmerbezug, Hudara wechsele und schnell verruma
Plötzlich wird's ganz still und dia beida chömmand nümma usam Stuna
Knappi Slip, BH, Stöcklischuah und anderi komische Hilfsmittel
Zu allem hera as riesa Beauty-Case mit Nagellack, Lippastift und ganz viel Glitter
«In dem Fall vermisst DIA iras Beauty-Case meh als I mis Nessesaire»,
Und dr Edi bringt dä Koffer zrugg an Bahnhof dura hektisch Pariser - Verkehr
Alli Formalitätä usgfüllt und ufam Rückweg gots nit lang do schällets denn sis Natél
«Bonjour, bonjour, elle et arrivé votre valise, wann kommen Sie das holen hier im Gestell»?
«Sie, jetz hani grad a Zahbürschta kauft, für hüt muas das jetz langa
Mina Koffer hoi mora, Merci et au revoir »,.... isch nomol guat ganga.....